



Conselho de Imprensa de Timor-Leste

Promove Liberdade Espresaun no Liberdade Imprensa

POZISAUN CONSELHO IMPRENSA BA PROJETO DE LEI SÉTIMA ALTERAÇÃO AO CÓDIGO PENÁL KONA-BA KRIMINALIZASAUN BA DIFAMASAUN NO INJÚRIA SIRA IHA TIMOR-LESTE

I. ANTESEDENTE

Política kriminál hodi kriminaliza difamasaun no injuria ne'ebé daudauk ne'e Governo apresenta ba Parlamentu Nasionál liu hosi PROJETO DE LEI SÉTIMA ALTERAÇÃO AO CÓDIGO PENAL (APROVADO PELO DECRETO-LEI N.º 19/2009, DE 08 DE ABRIL, COM BASE NA AUTORIZAÇÃO LEGISLATIVA CONFERIDA PELA LEI N.º 13/2008, DE 13 DE OUTUBRO), ho objetivu atu halo protesaun ba direitu fundamentál sira seluk liu-liu direitu de honra ne'e modelu rejime penal ne'ebé Timor-Leste adopta hosi ordenamentu jurídiku CPLP nian liu-liu Portugal.

Maibé dadus hatudu katak kazu sira relativa ho krime difamasaun ne'ebé deside husi tribunal Português hetan kondenasau dala 20 husi *Tribunal do Direitos de Homem* tamba viola artigu 10 da *Convenção Europeia dos Direitos humanos*.

Dadus mós hatudu katak nasaun europeus barak mak deskriminaliza difamasaun, ida ne'e hatudu katak la'ós modelu di'ak ida, ne'ebé Timor-Leste atu introdús iha sistema penal.

Ho kazu sira ne'ebé Portugal enfrenta iha Tribunal Direitos humanos Europeu nian penalista português Tiago Geraldo dehan: defende a descriminalização da injúria e da difamação, argumentando que devem continuar a constituir um facto ilícito e por isso dar direito a uma indemnização, mas devem ser retirados do catálogo de crimes.

Ho nune'e Conselho de Imprensa liu hosi meius ida ne'e hakarak hato'o nia hanoin ba Governo no Parlamentu Nasionál nu'udar legislador hanesan tuir mai ne'e:

1. Haree medida lejizlativa ida-ne'e nu'udar retrosessu ida sériu ba klima demokrátiku ne'ebé harii ho prosesu ida naruk no nakonu sakrifisiu povu nian durante tempu koloniál no tempu okupasaun.
2. Tuir lejislador balun afirma katak la fó impaktu ba Liberdade espresaun no imprensa maibé lei ne'e hatudu katak sei limite liberdade espresaun no liberdade imprensa. Ezemplu iha Nu. 2 artigu 187.º letra (B) ne'ebé hatete katak ajente ne'ebé halo deklarasaun verbal, eskritu, jestual, imageu ou kualkér espresaun liu husi meu sira komunikaun sosiál hetan pena prizaun to tinan 4 ou pena multa to'o loron 360.

3. Iha Artigo 187.º lestra (E) define kona-ba Conduta não punível. Iha alinea (C) numeru 2 ne'ebé regula kona-ba intermediariu diijal mak fornese servisu alojamentu ou transmisaun ba konteudu sira ne'ebé laiha karater difamatóriu nian sei esklui husi krime ida ne'e. Maibé artigu ida sei kondena momoos meius komunikasaun sosiál no jornalista sira tanba legislador sira la hatene katak sítiu eletróniku sira ne'e nia na'in mak media sira no jornalista sira mak halo transmisaun ba konteudu.
4. Alterasaun ba Código Penal ida ne'e hanesan tentativa atu hamoris fali pena kriminal sira ba liberdade espresaun nian, iha poténsia atu kria efeitu ida ne'ebé hamosu sentimentu ta'uk (*chilling Effect*) ba jornalista sira, ativista umanitáriu sira, no sociedade sivil em jerál, Universitáriu sira bainhira ejerse sira nia funsaun kontrolu sosiál nian.
5. Aat liu tan mak iha esbosu lei ida ne'e iha alinea (d) numeru I artigu 187.º- pontu (E) fó protesaun ba polítiku sira tanba konstituisaun fó garantia durante ezersísiu sira nia funsaun hodi espresa, mezmu sira halo ofensa ba ema nia direitu fundamentál sira.

II. FUNDAMENTU LEGAL NO DIREITOS HUMANOS

Conselho de Imprensa fundamenta nia pozisaun iha prinsípiu konstitusionál no instrumentu jurídiku internasionál sira hanesan tuir mai:

1. Iha artigu 19 Paktu Internasionál kona-ba Direitu Sivil no Polítiku (ICCPR) no Deklarasaun Universál Direitus Umanus (UDHR), ne'ebé Timor-Leste nu'udar estadu parte ida, iha obrigaun atu proteje liberdade espresaun laho interferénsia.
2. Iha artigu 40.º no artigu 41.º Konstituisaun RDTL (Constituição da República Democrática de Timor-Leste) ne'ebé absolutamente garante liberdade espresaun, liberdade imprensa, no direitu ba informasaun ba sidadaun hotu hotu.
3. Lei Komunikasaun Sosiál (Lei da Comunicação Social N.º 5/2014) ne'ebé fó **Direito de Resposta no Ratificação** hanesan meius defeza ba direitu personalidade sira mak hanesan direitu de honra.
4. Relatório CAVR mós iha rekomendasaun ne'ebé husu ba estadu sira atu dekriminaliza difamasaun hodi nune'e bele salvaguarda demokrasia ida saudavel iha era ukun-an ou pós-okupasaun nian.
5. Iha artigu sira ne'ebé define kona-ba exclusão ilicitude nian nafatin ko'alia kona ba interesse públiku nian bele exklui maibé nafatin eziji prova no fundamentasaun hosi ema ou jornalista ne'ebé halo publikasaun. Lolos la presija tamba tensaun entre direitu fundamentais hanesan direitu de honra no liberdade espresaun no liberdade imprensa ne'e prevalece mak liberdade espresaun no liberdade imprensa bainhira ko'alia kona ba interesse públiku. Tamba ne'e la iha fundamentu atu kriminaliza.
6. Relativa ho publikasaun sira ne'e la liu meius komunikasaun sosiál, Conselho de Imprensa hanoin katak la presija tanba iha código sivil regula hela no husik parte sira halo liu hosi asaun sira iha direitu civil nian. Tamba ne'e la presija penaliza iha código penal. Esperiência ida ne'e akontese ona desde tempu UNTAET nian *liu husi EXECUTIVE ORDER NO. 2000/2* ne'ebé hasai hosi Maktoban Sergio Viera de Mello kona-ba Deskriminalizasaun Difamasaun: Deklara katak difamasaun, hanesan regula iha kapitulu XVI (artigu 310 to'o 321) husi Kódigu Penál Indonézia (KUHP) ne'ebé sei adota hela iha tempu ne'ebá, declara katak la'ós hahalok krime ida iha Timor-Leste. No ida ne'e nu'udar baze hodi la tipifika iha ita nia kódigo penal hanesan krime.

III. POZISAUN CONSELHO DE IMPRENSA

Bazeia ba kestaun sira temi iha leten, Conselho Imprensa Timor-Leste hato'o pozisaun firme hanesan tuir mai ne'e:

1. Rejeita ho firmeza forma Lei no regulamentu hotu-hotu ne'ebé kriminaliza liberdade espresaun, inklui artigu penal sira kona-ba difamasaun no injúria ne'ebé ameasa liberdade espresaun no Liberdade Imprensa.
2. Avalia Distinsaun Espesiál ba Ofisiál Públiku sira iha esbosu ne'e hanesan sala boot ida, tanba ofisiál públiku sira tenke sujeita ba supervizaun pública ne'ebé aas liu, la'ós proteje sira-nia an hosi crítica sira uza ameasa prizaun.
3. Afirma katak direitu ba onra no reputasaun ema ida nian hetan ona akomodasaun adekua liu hosi lei sivil no mekanizmu kostumeiru sira, nune'e la presiza intervensaun lei penal.
4. Komprometidu tomak atu tane aas dignidade liberdade imprensa no jornalismo investigativu independente, laho intimidasaun ka lalatak kriminalizasaun husi autoridade sira.

IV. REKOMENDASAUN

Atu salva Timor-Leste nia estatutu nu'udar nasaun ida ne'ebé demokrátiku liu ho mós ranking Liberdade imprensa as liu iha Sudeste Aziátiku, ami rekomenda :

1. Ba Governu no Ministériu Justisa:
Atu retira esbosu, no kansela planu hodi submete lei ne'ebé kriminaliza difamasaun hosi lejizlativa nia ajenda.
2. Ba Parlamentu Nasionál:
Atu rejeita ho unanimidade kontinua submisaun projetu lei ida-ne'e ba sesaun plenária, no fó prioridade ba diskusaun sira kona-ba regulamentu sira ne'ebé urgente liu hanesan lei Radiodifuzsaun, Lei protesasaun dados no krime sibernetika.
3. Husu ba Sua Exelénsia Presidente Repúblika:
Atu uza nia poder konstitusionál hodi veta Lei ne'e se karik Parlamentu Nasional aprova Lei refere.
4. Ba Mídia na'in no Jornalista sira:
Atu kontinua servisu ho profesionál, hakruk de'it ba Kódigu Étika Jornalística, no hametin funsaun check and balance ba interese públiku.

V. TAKA

Liberdade imprensa no liberdade espresaun la'ós ameasa ida ba estadu, maibé nu'udar ai-riin fundamentál ba demokrasia. Esforsu atu taka ema nia ibun liu husi lei penal sei prejudika de'it Timor-Leste nia dignidade iha comunidade internasionál nia matan no nu'udar traisaun bo'ot ida ba eroi sira nia luta.

Dili, 10 de junho 2026
Conselho Imprensa de Timor-Leste